

## Notg da film 2008

(FcT/th) **La sisavla notg da film dil Forum cultural Tujetsch ha carmalau da quei da 150 persunas venderdis sera, ils 8-8-08, ell'aula dalla casa da scola Sedrun. El center dalla sera ei il film staus ch'ha documentau l'erecziun dil conduct ault atras la Val Mila igl onn 1949. Plinavon han la revista 07/08 ed il film Ivo e Laura delectau aspectaturas ed aspectaturs.**

L'aura ha buca lubiu dad organisar la notg da film per l'emprema gada sil plaz sper Tgès'alva a Sedrun, ton che la presentaziun ei vegnida dislocada en scola. L'atmosfera tut speciala d'ina presentaziun ora el liber va aschia empau a piarder.

### Revista 07/08

La revista ei ina documentaziun filmada d'eveniments succedi ella Val Tujetsch. Bruno Berther da Rueras ei staus presents tier las suandontas occurrenzas ch'ei vegnidas mussadas quella sera:

Conferenza da pressa dalla Porta Alpina

Prelecziun dils cudischs da Vic Hendry ed Arnold Spescha

L'undraziun da giuven sportivs entras la vischnaunca

Til da tscheiver 2008

In di cun la tiarza classa dil scalem ault Tujetsch

Dil reminent san interessai retrer la revista, sco era revistas dils onns vargai tier Bruno Berther, Rueras.

### Val Mila

Il conduct ault tras nossa Val enasi tras la Val Mila e sur la Mittelplatte ei buca da surveser. La construcziun ed erecziun dils masts ei succedida el decuors digl onn 1949. Il film documentar, filmaus dalla Firma Murer SA, ha mussau a moda impressiunonta, la moda da luvrar da gliez temps, sco era in plazzal da lavur da gronda dimensiun. La cumpregliaziun cun las lavurs digl onn 2006, ha mussau eclatantamein il svilup dils davos biabein 40 onns. Robert Bohnenblust, il luvrer da gliez onn tier l'erecziun dils masts, ha commentau il film cun indicaziuns fetg informativas.

### Ivo e Laura

Il tema: Duront las vacanzas sedecida la gruppa da scholars da far in viadi a Cavorgia e star leu in per dis en in camp. Nunspitgadamein arriva ina secunda gruppa era a Cavorgia. Las duas gruppas han differentas tenutas e sedeportan era different. Ivo dils Baroc pitescha d'ina malsogna nuncurabla. Quei vul el denton buca schar percorscher. Laura dils Hippis ed Ivo ein s'inamurai. A Cavorgia schabegia in tragic accident. Tgi ei la cuolpa?

Quella producziun ei vegnida filmada dalla Televisiun Rumantscha cul regissur Mic Feuerstein culs scholars/as dil scalem ault igl onn 1991 e vegnida mussada il fever 1992. Gissiat onns ein pia vargai dapi la registaziun dil film. Ils giugadurs giuven han giugau sias rolas a moda suverana, il film fa impressiun ed ei secapescha pils giuven e giuvnas acturas in document zun perzius.

### La notg da film

Sis onns nuniterrutamein ha il Forum cultural Tujetsch delectau ils interessai cun films che pertuccan nossa val. Mintg'onn ha era la revista delectau ils presents. Anflar mintg'onn material divertent ei buca adina sempel e crear in revista ei cumbinau cun bia lavur e preschientscha. Zacu ei il material buca pli avon maun. Il Forum cultural Tujetsch ha ord quella vesta decidiu dad interromper il ciclus dalla Notg da film. Bugen vesess il forum l'iniziativa da Tujetschins/nas da cuntinuar cun quella purschida en ina outra fuorma. Co fuss ei cun in festival da films alpins, films da muntogna che cuzzass forse ina entira fin d'jamna? Ina nova unica purschida en Tujetsch per la sesiun da stad en in ambient muntagnard!